

Achoimre ar an gComhairliúchán

Meastóireacht ar Rialachán 906/2009 ón gCoimisiún maidir le hAirteagal 81(3) den Chonradh a chur chun feidhme maidir le haicmí áirithe comhaontuithe, cinntí agus cleachtais chomhbheartaithe idir cuideachtaí loingseoireachta línéir (cuibhreannais)

Is éard is seirbhísí loingseoireachta línéir ann iompar lasta muirí a chur ar fáil ar bhonn rialta sceidealaithe ar bhealach sonrach. Teastaíonn leibhéil shuntasacha infheistíochta lena n-aghaidh agus dá réir sin is minic a chuireann roinnt cuideachtaí loingseoireachta na seirbhísí ar fáil, cuideachtaí atá ag comhoibriú i gcomhaontuithe “cuibhreannas”. Is féidir barainneachtaí scála a bheith mar thoradh ar chuibhreannais agus is féidir go mbainfear úsáid níos fearr as spás na soithí chomh maith. Is féidir cion cothrom de na tairbhí a thiocfaidh as na héifeachtúlachtaí sin a chur ar aghaidh chuig úsáideoirí na seirbhísí loingseoireachta i bhfoirm cumhdach níos fearr a dhéanamh ar chalafoirt (feabhas a chur ar mhinicíocht seoltaí agus stadanna calafoirt) agus i bhfoirm seirbhísí níos fearr (feabhas a chur ar an sceidealú, seirbhísí níos fearr nó níos pearsantaithe a chur ar fáil trí úsáid a bhaint as soithí, as trealamh agus as saoráidí calafoirt níos nua-aimseartha).

Le hAirteagal 101(1) den Chonradh ar Fheidhmiú an Aontais Eorpaigh (“CFAE”) cuirtear cosc ar chomhaontuithe idir gnóthais lena gcuirtear srian ar an iomaíocht. Mar sin féin, ceadaítear le hAirteagal 101(3) CFAE a dhearbhu go bhfuil comhaontuithe den sórt sin comhoiriúnach leis an margadh inmheánach ar choinníoll go gcuidíonn siad le feabhas a chur ar tháirgeadh nó ar leithdháileadh earraí nó go gcuidíonn siad leis an dul chun cinn teicniúil nó eacnamaíoch, agus go bhféadann custaiméirí a gcion cothrom a fháil de na tairbhí a thiocfaidh as freisin gan deireadh a chur leis an iomaíocht.

Foráiltear le Rialachán 246/2009 ón gComhairle, i gcomhréir le forálacha Airteagal 101(3) CFAE, go bhféadfaidh an Coimisiún, trí bhithin Rialacháin, comhaontuithe cuibhreannais a dhíolmhú ó Airteagal 101(1) CFAE a chur chun feidhme ar feadh tréimhse lena bhfuil teorainn cúig bliana, tréimhse a bhféadfaí síneadh a chur léi. Dá réir sin, ghlac an Coimisiún Rialachán 906/2009 (“Rialachán na gCuibhreannas” anseo feasta), rialachán ina leagtar síos coinníollacha sonracha maidir le díolúine i gcomhair comhaontuithe cuibhreannais. Is é is aidhm do na coinníollacha sin go háirithe a áirithiú go bhfaighidh custaiméirí a gcion cothrom de na tairbhí a thiocfaidh as. Rachaidh Rialachán na gCuibhreannas in éag an 25 Aibreán 2020, agus tá sé beartaithe an mheastóireacht a thabhairt chun críche roimh an dáta éaga.

Is cuid den mheastóireacht ar Rialachán na gCuibhreannas an comhairliúchán poiblí seo, comhairliúchán ar cuireadh tús leis i mBealtaine 2018. Is é is cuspóir don chomhairliúchán fianaise agus tuairimí a fháil ó na geallsealbhóirí d'fhonn an tionchar agus an tábhacht atá ag Rialachán na gCuibhreannas a mheasúnú agus d'fhonn bunús fianaise a thabhairt lena chinneadh cé acu ar cheart ligean dó dul in éag nó fad a chur leis (agus na coinníollacha faoina ndéanfar an cinneadh sin).

Beidh an comhairliúchán ar an gceistneoir sin ar siúl ar feadh 12 sheachtain. Déanfar anailís ar na freagairtí agus poibleofar na príomhphointí agus na conclúidí ar shuíomh gréasáin an chomhairliúcháin.

Is iad na príomh-geallsealbhóirí ar a bhfuil an comhairliúchán seo dírithe, na hiompróirí, agus a gcliant (seoladóirí agus seoltóirí lasta), oibreoirí calafoirt agus a gcomhlachais faoi seach. Is é leas na n-iompróirí, a chuireann Rialachán na gCuibhreannas i bhfeidhm, agus ina dhiaidh sin leas a gcliant, a bhaineann tairbhe as na buntáistí iarmhartacha, an leas is mó is féidir a aithint, ach d'fhéadfadh siadsan bheith neamhchosanta ar aon saincheistanna maidir le dlí na hiomaíochta a thiocfadh as na cuibhreannais.

Ar na páirtithe leasmhara eile a mbeidh tábhacht lena dtuairimí tá anailísithe tionscail, lucht léinn, agus gnólachtaí dlí arb iad dlí na hiomaíochta agus an earnáil mhuirí a sainréimsí. Lorgófar tuairimí ó údaráis iomaíochta na mBallstát freisin.